

四庫全書

集部

欽定四庫全書

集部

東塘集卷二

二

詳校官右中允臣薩敏

主事臣呂雲棟覆勘

謄錄監生臣張曾壇

謄錄監生臣范維城

欽定四庫全書

集部四

提要

東塘集二十卷

別集類三

宋

臣等謹案東塘集二十卷宋袁說友撰說友字起巖建安人流寓湖州登隆興元年進士第嘉泰中官至同知樞密院參知政事說友學問淹博留心典籍官四川安撫使時嘗命屬官程遇孫等共輯蜀中詩文自西漢迄于

淳熙為成都文類五十卷深有表章文獻之功其集則書錄解題宋史藝文志皆不載故厲鶚宋詩紀事僅從楊慎全蜀藝文志採其巫山十二峯詩一首從郁逢慶書畫題跋記採其題米敷文瀟湘圖詩一首而不言其有集則非惟詩文散佚併其集名亦湮沒不傳矣今據永樂大典所載蒐羅排纂得詩七卷文十三卷又家傳一篇不知誰作後半文已殘

缺而前半所叙仕履頗詳亦並存之以備考證集中題跋諸篇于司馬光韓琦歐陽修蘇舜欽蘇軾黃庭堅蔡襄米芾諸人皆慨想流連服膺甚至而跋默堂帖一篇於王安石新學之失辨之尤詳知其學問淵源實沿元祐之餘派故其論事之文曲折暢達究悉物情具有歐蘇之體其詩與楊萬里倡和頗多五言近體謹嚴而微傷局促七言近體警快而

稍嫌率易至于五七言古體則格調清新意
境開拓置之石湖劔南集中淄澠未易辨別
矣說友數歷中外凡三十年其政績雖不盡
見于後然章奏敷陳多切時病今集中尚見
大凡其論守淮宜用武臣一疏謂文臣不諳
兵事不宜以邊務委之切中當時坐談僨事
之弊非迂儒之所能言又蜀將當慮其變一
疏引崔寧劉闢王建孟知祥為戒說友歿後

卒有開禧吳曦之變若先事而預睹之其識慮亦不可及魏了翁鶴山集有祭袁參政文以耆臣宿弼相推惋悼頗深當非無故宋史不為立傳殊不可解今收拾于散佚之餘剩簡殘篇尚能成帙俾其人其文併藉以傳則是集之存其足補史氏之闕者又不僅在詞翰間也乾隆四十六年九月恭校上

總纂官_臣紀昀_臣陸錫熊_臣孫士毅

總校官臣陸費墀

欽定四庫全書

東塘集卷一

宋 袁說友 撰

五言古詩

連宵得雨應禱

蜀旱昔流行皇恩念凋瘵饑寒乏冬酒烹剥仰春菜二
麥僅復失一飽竟安在當春苦旱乾甘澤未沾沛奔走
山川靈翻覆雲雨改連宵建瓴水萬畝輕花穗如渴飲
得泉如病藥得瘥高原沃清潤熱蒸蒸蒙濯灑只今麥隴

收可以日月待喜氣挂珠玉詞源擁濤瀨自憐憂國願
窘似生體疥得此霖霖益遂入清涼界容我早歸田懷

章東望拜

案此詩上去二聲互押集中此類甚多今悉仍其舊

被旨許浦閱舟歸

皇家百萬兵一一拱行闕盼恩勞軍士有詔消良月鳴
鑾肅天仗君王自親閱旌旗照輦鼓鎧甲耀冰雪金繒
辱君賜再拜嵩呼疊天子曰嘻哉長江殆虛設雲屯皆
壯士寧有中外別廼命臣某某腴犒均行列許之問軍

旅利害與優劣臣聞疇昔論舟師利通捷出入如風馳
進退如電掣鄉來經始意規置有餘烈更張一何誤事
亦隨廢缺橫舟卧平沙鏊胃半折裂蒙衝纔什五水卒
無梟傑祇今衆弊見喋不一語決往往憂國者無路伸
喙舌小臣愧不敏銜命紆華節願陳一得慮竹頭而木
屑方畧許圖上稽首思罄竭君王赦其愚臣敢畢其說

書懷

攤書志尚友吐吐心如癡上言思堯舜下言商龍夔搜

奇日有富得句中自怡家人問產業即曰非所知
古人不可見古書今可求尋源謝潢汙至味捐珍羞朝
曦去還至夜炬燃復休從此飽文字不聞飢餓愁

采石遇順風

我觀挽强弓去鏃不可止弓力小有盡所至亦無幾又
觀鴻鵠飛冲霄勢難已天高羽翼倦俄復知還矣何如
我行舟雄風東北起危檣張橫幅波濤湧前水青山掠
窻戶白浪送舟尾快哉一帆速何止萬牛比飛蓬偶颭

灩稚子且憂喜衆曰無彼懼天借此風只鳴鉦十數過
瞬目三百里嗟我出修門江湔半經履輕舟縱壑便未
見捷如此頗聞順逆勢殆似倚伏理逆境當反視順亦
無自侈今朝進固銳明日去還弛遲速本何常付之造
物耳

過風頂山

直上風頂山如接天上語環觀千里內此山峙為主循
彼下山脊翠石滿原撫巉巖巧雕刻詭特效螭舞青

蒼高一色磊塊千萬數光膩細潑油滋腴潤經雨攢天
石林居綿地三茅宇大湖石可並靈壁磬同取少却俄
回首一洞視須俯崖深拱四壁下蟄蛟龍虎梯躡不可
下蹲望深可怖但覺拂衣塵微風洞門鼓太息天地間
紛紛詫竒觀雲收樹陰轉山淨川華吐長吟筆力窮小
憩去程阻

泊采石登蛾眉亭蛾眉山為雲靄所蔽

平生山水緣所閱輒相偶尋幽半江浙領擘如益友我

聞姑孰下二梁山對守兩娥顰黛遠久落詩人手今行
適未到夢寐念殊久今朝古亭上四望一無有風嵐暝
四合雲沙漲江口渺渺天際間了不辨妍醜登臨漫連
日所得竟何取嗟予山澤姿林泉賸奔走歲晚憶蛾眉
欲見事還否人間遇不遇難以智力誘墜樓人不見舉
案情何厚何如對此山遠拂雙眉柳風檣明日上相期
後牛首天淨楚江寒黃昏一杯酒

過新灘百里小駐峽州城

明朝上巴江日日峽中行天險三峽路峽險灘頭程就
中十二灘新灘尤可驚父老記往時此地江流平一朝
陵谷變崩裂山崢嶸大崖江裏卧小石江心橫作此一
大灘水石相吞并濤雷殷晝夜浪雪鳴軒轟空山十里
遙已接千鼓聲未流到山尾猶作洶湧鳴朝家憂病涉
遣使勞經營輦石竟無謀舟至不敢征東來西上者因
有盤灘名我來灘水傍滾沸如煎烹衆畏豈不畏稚耄
棲簷楹遐觀一舟來掀浪嘈鼓鉦羣夫山下蟻百丈風

中第衝濤已颭灝轉柁猶歌傾戛戛到龍門艱苦如頡
羹須臾近平峽便覺天地清携孥穩垂舟相慶如更生
蜀道登天難於此論始明況我衰病餘懷此憂懼情國
恩念未報一葉身為輕小臣抱孤忠思有稱使令舉酒
望星河作詩聊自評

江舟捧夫有唱湖州歌者殊動家山之想賦吳
歌行

我家苕霅邊更更聞夜船夜船聲欸乃腸斷愁不眠一

聲三四咽掩抑含淒切宛轉斷復連盡是傷離別兩月
江頭程杳不聞此聲身游荆渚路夢到湖州城但聞空
山女兒呼不見前溪漁父鳴今朝擗頭上忽作吳歌唱
初聲與後聲一一渾悲愴問汝何所得昔棹吳中航吟
得溪女曲動君思故鄉我方西上夜夜夜家山側聲聲
勸早歸雪水年年碧

和魏南伯縣丞寒食西湖韻

紅塵久厭人湖山猛從事巾車出西關觸目飽幽致聊

從吸鯨飲發我湧泉思松鳴當綠竹山肴勝肉味愛此
天地寬無復名利覲淡粧與濃抹晴雨蓋一類車馬幾
馳逐簪珥頗遺棄稍出鸛鷺行來與鷗鳥綴歸來燈火
近忽枉珠玉遺三復已醒然襲藏有巾笥

二月上澣會制司幕屬和孟誠之制參韻

三刀入夢鄉遠作益州鎮空懷十駕念那復一簣進心
勞政自拙愧彼東郊尹得人盛烏幕澹臺不由徑競効
有用學一掃虛名徇雍容三語掾文潤相涵映一樽聚

羣彥坐乏黃封印開懷縱清酌詞鋒凜豪雋春花自開
落醒醉百念靜談笑吐胸臆寧較名與分矧茲賓客賢
訟過便平聲退聽吾儕東與西邂逅喜滋甚惜也民菜色
旦旦急荒政及茲雨膏麥觴詠是招聘我方道州考盍
抗歸老論早上竹竿船故園松菊盛

和林子長韻

橫塘老居士官意云蹉跎歸田百頃溪一目真恒河春
來幾櫛沐昧者時工呵惟公獨未然計拙樂且多秧針

破水面照影成婆娑黃梅雨朝昏已壓前溪荷連旬聽
盆傾頽空競嵯峨城頭望彌漫湖海環丘坡橫隄蕩如
洗滅沒相陂陀

陂陀謂廣袤也

却聞城南園千丈一水過堅壁

了不動坐勝洪濤波佛力與願力精意馴蛟鼉獨此夏
日雨慰公春時簑我方歲事憂一飽今無何乞我黃淤

秋

後山詩乞我黃淤十里秋謂田也

同此天地和不然遂彈鋏稍續馮

君歌

和林子長韻二首

霜風弄衣結脫木嘶千峯寒暑相主客造物誰為功百
年俯仰間逸興追林宗白髮已種絲飛雪篩長松宦遊
豈不佳於我馬牛風

我老倦吟哦君詩如淵明秀句出閒暇熏然有餘情寒
深雪意淺頗厭十日晴東鄰買嬋娟一斛明珠輕借我
一面看詩人豈狂生

又和三首

兄弟生同室長大相差池浮生朝露如歡樂隨憂悲南

來幾飛鴈北去歸同時嗟君胡不知恨此何可追

右感鶴鵠原

前生老居士識我臭味同詩囊欲往來一別已再冬相
從能幾何歲晚驚飄蓬須賦早歸歟共老千巖松

右懷蕭居

人生自作難百念一已多七十古稀有況此疾病何紛
紛老駘駕失脚千丈坡行樂當及茲歲月如經過

右歎七十

和王德和知縣謁蕭千巖韻二首

虛名誤壯夫黃金變顏色誰歟帛米謀因此窮狗迹安
和一榻上精神餘筆力我欲造之深劇談忘漏刻

詩工解窮人詞苦乃見意味公千巖篇粗了瑟個義平
生師友念正爾金蘭契毋使我迴還執炙不知味

和林子長訓諸郎韻

祝羸不知難舐犢不知累我生飽經涉一一如歷塊泛
觀孩提兒鏗鏘捷應對由其學不學所入遂同異有子

當務教否則基業墜明經仰韋賢所重識與器黃金委
塵土教子遊於藝父子踵黃閣功業美且粹最憐房杜
家門戶早覆簣紛紛不肖子掃蕩等劇戲賢愚豈少年
成敗見晚歲君家萬金產兩兩蘭玉萃兒時見頭角已
負食牛氣誦詩了瑟僖引義觸傳類長大守經訓含咀
樂心醉瀾翻紙上語筆力功憑恃老蚌生明珠光彩爛
足畏渥洼墮龍種不數蟾蜍輩孟仲叔季間更盛而迭
貴吾兒豚犬耳衣鉢尚可遺登門倚羣玉辱交每不外

金華四子集 卷一
譬如般若光照此大海會願續無盡燈庶為宗門慰

和梁飾甫通判招飲林子長溪堂韻

多病苦長夏歎盛朱明得秋如故人一見意已清夜
來風襲月桂柳窺欄楹頗憶橫塘溪百計無餘營清風
菡萏秋搖月中聲剽聞有新約賓主意各傾妙語含
風漪一笑掣可橫尊前久佳客豈無葛強生

再賦

千家滿明月更覺雙溪明秋來詩酒無母乃亦太清詩

筒解我意續續堆軒楹豈無斗酒藏而待君所營頻聞
別駕賢行聽立鵲聲秋光恐無幾有酒何從傾扁舟下
滄浪及此月猶橫要當辦茲遊奇絕誇平生

郡寮案樂飲趙判院有詩次其韻

簿書紛如絲取樂得少空悠然杯勺興藉此歌舞送從
事來官厨醉不睡隣甕衣裳賸蘭澤言議雜囂閨人生

醒忌獨勝日飲須痛向來講上鷹府公解其縱

食判司
理稟樞

相許之
方作會

先生作禪卧肯以靜啗動形臞詩則昌萬境供

日用文字與紅裙寧非一理共退之強分別無乃夢中
夢絲竹娛中年耐此髮種種明當解予醒酒德賡舊頌
病不能從沈德遠少卿草堂釀飲

溪南十里山有客今淵明歸來厭城市著脚鷗鷺汀客
來笑談劇日暮車馬行我昔曾見之浩氣猶憑陵尊酒
浸成列翰墨時相迎慚渠前日約念此故舊情衝風走
籃輿剥啄山頭扃人生等遊戲底問割與烹但令賓主
歡莫識衆我醒母以患難移政須公主盟

李兼濟分教江陰

結交不在久但問交者誰相從何用頻要以道誼期我
初未識君已誦班馬辭太學金薤篇爛若琳琅垂妙理
邈家學雄文想英姿天乎慰此心而獲親芝眉一見語
未盡覺我驕氣移荷君偶過聽得我嗟何遲我方縛微
官君亦居所疑於今五六年見日常差池有時適相逢
一語不及私往往從容間百篇惟新詩歸來念所得如
日身親之君將抱停涵一洒澄江緇想君車馬至短褐

環旌旂萬口如一詞是曰得所師一斑見稍稍士氣今
虹霓江城見儒英而我失所資自慚索米久不去今何
為及瓜早歸歟問舍江之湄政須邇門牆作意頻追隨
窮達於其天紛紛徒自欺買羊沽酒日剖此胷中奇

沈德遠守衢州用林子長通判送行韻

宦海足風波洶湧百態動更嗟為郡難一木支橈棟利
害秦越瘠謗譴鄒魯閑區區美衆口於道竟何用一墮
怨憎機玉毀石可貢鄉來羞染指負此淮陽重公今上

柯山威望壓羣衆州橫車馬衝吏黠機巧共寬猛歎何
適往事成一夢利孔百已竭舉手下輒訟其難皆如此
要以人折衷如公補天子輕重識抱甕善刀而藏之游
刃真總總政成餘嘯坐事定畧銜控人生五馬貴願公
還舊供歸來佐雄畧一洗潢池弄我方煙霞痼爾若丹
霄鳳儻知下愚賢應笑臧文仲

王恭父出守洋州二首

胸中萬卷書足下四方志士任重道遠渠以中外異肯

繼承明直狹此天下計方此議遠畧慷慨誰襍被翻然
有抗章屬之英儒耳

我懷粗憂世所遇輒盾矛自公握手初臭味一一投一
麾咸陽邊而豈但寢謀應有齊人者歸此侵疆不小策
洋州勲不止萬戶侯

鄭惠叔閣學守建寧三首

天生棟梁姿本作棟梁用豈其天下望可使缺萬衆乾
坤欲開泰數定不可霜我公胷中秋萬寶一未種士其

少須之要以他日重

周之士也貴如圭璧璫璣東陝與南土出入本裕如高
冠不可羈位次實有餘輕此一葉舟孰肯戲魯儒自公
抗章行益以貴士夫

公乎斯文宗學者仰泰北而我幸姻婭心切迹每枯龍
門甫登進已動驪駒曲江湖搖歸心我亦慕高躅更愁
帆風船無路送雙目

時方護客不獲
與江頭祖席

贈王副伴

將軍年少時束髮在行伍西方頃多事二十勇如虎一
身殆百戰手足瘡四五征行久邊戍肯憚服役苦西陲
五十郡一一經險阻一官三十年銖積僅如許我聞中
興後卷甲久未舉宿將零落盡屈指不可數政恐據鞍
者驕懦如嬰乳時平偶無事酒肉而子女問之行陣事
縮頭而栗股有如將軍乎少小服軍旅金瘡歷歷在末
老勇亦賈抵掌談世事忠憤氣如鼓願欲奏君王臣不
知死所輕舟明月夜慷慨聞奏語醺酒誓長淮有力期

共勞歸去覲前旒此懷須盡吐

觀野塘荷花

淤泥生荷花物外各有性環城散紅錦颭灩滿支徑人
卧蓮葉舟酒吸碧筩柄箇中有真樂樂盡意不盡

松坡

陵坡擢孤根生意已翹楚主人歲寒姿於此眼目具夷
荒挺勁節偃蓋浥溥露相對琳琅篇後來慚驥附

大石

困卧藍輿中醒視人影直伸頭起四望不斷山環碧羊
腸路百轉當面一蹲石高廣不可際隆重誰與匹宛如
百楹屋玄繒四籠幕又如龍虎踞煙雲繞其側突出衆
山間旁無他石立古今歲年久光彩淨如拭兒童梯級
上羣聚相戲劇偉哉殊特觀我來聊扣擊汝從何代有
長養成大質汝今閱世多幾見陵谷易漢王欲東時曾
經車馬迹武侯三顧後曾見王師出衮衮千萬載人與
事如織興亡竟何在而汝獨如昔古有石能言今乃不

可詰徘徊不忍去撫掌重太息安得李將軍一箭誇雄
力

遂寧府庫古銅物

我貌殊不古而有好古心未老已成癖此病那砭鍼本
非口腹累乃困耳目侵遂州古名邦有物歲月深一一
銅作器得之古墓陰燈罌間管柱匝耳擎杯斟劒弮累
蒼節鳳口塗黃金人形雜獸面詭異難撫臨模糊滓塵
土剝蝕遭晴霖摩淳細拂拭名代不可尋楷矢辨形質

古磬鳴聲音一經聖賢手疑信別古今佳哉今所藏歷
世方駸駸會當有博雅破此聾與瘖敢效石鼓歌吾意
豈微吟

蘇公內翰栢石圖

栢生兩石間顏狀何落落下行鬚接石脉生理初甚約豈
無螻蟻窺未免風雨剝孤撐謝栽培欲取那可攫森然
兩石意與栢真不薄崢嶸炎涼外盤踞互相絡千尺意
有餘凜凜未可度公看養口體怪此軀幹削滿眼較短

長瑣細公所畧

題陳氏淨香亭

人生樂事難清節視險夷遇坎而履坦詎以得喪虧我
觀萬物間獨此琅玕宜頎然挺氷操得之風雨時秋風
桐飛翻夏雨民怨咨休迫真乃見嗟物如一岐此君豈
其然風雨而不移娟娟淨明月細細香浮漪此理固千
載俗士難與知洮湖著危亭千畝甯中竒植此凜凜節
照公堂堂姿仕已輕浮雲喜愠不一施山高空翠濕草

勁便

平聲

疾吹此風此雨至公乎無磷緇我方索米久官

事成痴兒望公瀟洒中糞壤與茵芝何當亭上遊細誦

簡齋詩

題楊誠齋南海集二首

君侯大雅姿萬態歸物色商畧南海句以心不以迹試
吐胸中奇如臂指運力今推王揚賢童子漫雕刻

詩以變成雅騷以變達意變其權者徒中有至當義水
清石自見變定道乃契文章豈無底過此恐少味

至游堂二首

力田須逢年掘井須及泉學者志於道如以規正圓及其見道時攬轡誰爭先筌蹄蛻陳迹羽化而登僊是時反觀一一人之天森然衆妙現所見惟所便猗與至游者日運萬里船胸中三景軸與道相因緣道大心以悟心遠見孰偏一室景象存物物隨飡眠不游以為游至樂無冥顛游非在山水默與山水聯天下有至游得道有至賢賢者以道游百游不一愆至于游俱忘公與

道獨全談笑出清風樽壘益欣然張扁說中郎訓記增
雄編嗟予幸升堂頓覺塵垢滯從公至游境左右餘芳
鮮歸來欲語人心知口難傳

嗟哉予少年學志如蒙泉區區指漫血未識方與圓晚
於方冊間再拜予公先琳琅粲珠璣意公真其僂寒窓
手不停朝暮披雲天已辦膺門登肯放邊腹便一身落
宦海去若不繫船懷此日月長歲晚而魚緣長安初拜
公樞趨立庭偏一見意未盡憤憤如醉眠春闈接從容

拜賜喜欲顛夜半呼論文不復懷官聯此身願持似稽
首從公賢一意門牆歸稍却名利愆尋幽並湖山百計
一未全而公亦倦游卜築方怡然把酒問明月誨我詩
成編淋浪身上衣歸喜那更前雄篇富褒拂字字華袞
鮮吾儕一辦香斯文今有傳

東塘集卷一

欽定四庫全書

東塘集卷二

宋 袁說友 撰

七言古詩

仲春勸耕有獻兩岐麥者和丁端叔茶使韻

周原撫撫侔歌頌我訪春郊
屆義仲市橋曲屈古招提
媚日暄風傍韉鞵布宣德
意父老喜醉飽盤餐兒女
共眼看秀色壘頭多風落
輕花枝穗重東皇生意滿
阡陌不待池塘春草夢
道傍瑞麥獻者誰秀出
雙枝駭羣衆

春風和氣下披拂，產出禎祥呈妙用。我思昔歲旱為虐，
幾度牋天香火供。懸知政拙漫心勞，自慚弗稱甘泉從。
今年春到一犂牛，是處膏腴飽耕種。舉趾于耜競東作，
剝棗烹葵弭田訟。三農儻遂富庶樂，四體如忘疴癢痛。
只今貽此來牟喜，大手鋪張煩屈宋。崆峒有詠拾遺語，
茂陵作頌相如諷。司馬相如居茂陵作頌曰嘉穀六穗詩成豈待擊鉢催，
句惡自慚操管弄。與君拍手頌豐年，姑置別離傾酒甕。

行麥龍

農操豚蹄競謀鬼已信今年非昔比十日五日風雨時
好語急傳兒女喜南來麥熟春事收東郊日落人影稠
騷人一見喜不盡新詩預慶豐年秋懸知聖德回天地
荒政已修非罪歲目前更看牧羊人不覺維魚來夢寐

禱祈喜以甲子日得晴

去年閔雨忙今年以晴禱年年水旱苦關心憂國不知
身暗老蜀田百里無陂池山頭隴畝如畫碁平時憂旱
不憂水秋水十日憂雨垂天公忍使垂成阨但把精誠

期威格扶桑忽上東海來一夜天清風露白今朝甲子
逢晴秋定應無耳生禾頭少待餘糧棲畝日倩渠送我
歸田休

詠晴

農夫一飽嘗憂遲十年五旱無已時今年隴上消息好
天不靳我食與衣黃梅雨了時雨至三尺稻梗一尺泥
不憂夏潦憂甲子阿香忽放雷車歸白波翠浪雨露足
已覺抄雲先簸糶新春入甑供晨炊吾農自此今無饑

邇來更說蠲輸好州邑撫我如嬰兒如今不怨田家苦
但憶詩人歌子婦

喜晴即用前韻

春田欲雨常憂遲夏田得雨嗟踰時春耕夏耨兩無及
眼乾淚竭空沾衣翻翻聯聯脚力盡萬車不救一尺泥
朝看東南暮西北晚霞倏忽山頭歸白日一照黃潦定
秋來準擬節紅糶早田拾得晚田熟今年更救明年饑
念夫隴上一月宿趁晴歸欲呼妻兒與夫歲歲同甘苦

未容恤緯慙楚婦

江行有惠梅花者因憶杜少陵云江上被花惱
不徹無處告訴只顛狂遂借此意而吟

去年短擢孤山閣尋得橫斜在籬落帶花飲酒六七人
醉傍錢塘城下泊今年江上花惱時無處告訴狂如癡
一枝的皜對無語獨把詩酒相羈縻平生百念輕於髮
惟有梅花心未歇只愁花謝老相催老盡頭白花又發

峽中聞杜鵑

春風破曉晴嵐濕客子玲玕去程急空山兩兩杜鵑聲
回首家鄉無羽翼勸歸不歸聲厭多旅懷刺刺空奈何
君不見秭歸城上今啼不多少行人滿江口

聽道人彈琴

東城尋春春事濃長嘯理策蓬菴中道人飯了徒快睡
萬慮一洗惟絲桐高山不斷春嘖嘖流水無言聲磔磔
月明露冷意有餘夜想朝吟恨誰釋平生心賞竹間尋
歲晚欣逢正始音煩君更撫文王操慰我寒窓在此琴

和林子長海棠韻

去年寒食猶依然海棠花落南溪前
風隨雨雪作三瓦燕支落盡無人憐
今年花下去年色不暖不寒三月天
花間置酒君有意我負宿約慚周旋
年年惜春春易老春去花殘常恨早
勸君更辦一杯春明朝捲地東風掃
園溪已漲桃花急月明夜釣漁舟笠
君能割我半亭溪寧嘆此錐無地立

和趙周錫詠魏南伯家葱茶韻

武夷十月嘗先春風生兩腋撩詩人玉塵一縷輕且純
不與凡味爭比鄰鐺中碧玉濤湧銀七盃不厭烹啜頻
書憲假寐熟欠伸重煎倍覺滋味勻吾鄉此茗孰與倫
誰家却說江茶珍剝葱細切誇珠蠙泛甌更騁如鋪璘
不知珉玉難並陳從來居上嗟積薪魏君胡為白頭新
懷兄詎可論不均我雖曾沃齒下齟不敢溢美忘鄉津
方圭圓璧當春晨請君反本母子嗔

和林子長謝徐吉甫蒲萄韻

吉甫生子與
仲子同日

吾兒癸卯豚犬耳徐家同日生明珠廼翁愛子愛其類
堆盤歲歲分甘腴嘗新既足旨甘奉遣送更欲均有無
但肯食芹而美矣如渠此意夫豈徒嗟予已老將疾至
肉味不啜惟僧蔬忽驚馬乳墮几案未免饒口食其餘
及茲滿架未零落少待明月相攜壺

和魏南伯乞酒韻

古人行旆誇碧油我舟寂寞隨處留何人夜半詩博酒
鬼神欲泣如楚囚一朝江上同漂泊莫向樽前情淡薄

為君更作白頭吟
欲辦錦囊慙句惡

小飲

殘蟬古路無人跡
瑟瑟西風已三日
杜門却掃處一室
顛倒筆硯理書帙
平生但恐辜吟筆
薄宦雲浮奚固必
客來相與入詩律
一葉庭柯恍如失

和王使君惠詩酒韻

我生紀歷三逢申
久矣隻影誰為親
戀彼溪山意已在
舉目更友君子人
言論道德歸大醇
封菲下采顏色溫

買羊一見慰飢渴載酒三就忘辛勤今朝好語幾盈門
排攢炫晃驚童孫字向紙上欲翻舞句生妙處增清新
推憲更沃囁嚅口便覺四體陶然春嗟予從此毋多作
君方袖手韜竒畧詩壇行即拜將軍莫謂小兒多淺薄

和董顯叔韻

江南人物在覲面足以慰予疇昔念識公只在文字間
君子若人今子賤江湖路遠睽言談八年於外自亦閒
有時拂拭舊珠玉端欲論詩伯仲間公懷席珍方就聘

一航我欲長安近只知喜接故人歡寧羨官高如斗印
羈懷寂寞逢春光未著語意何可當下惟諸孫出新句
如蠶抽緒思無疆一詩傑出駭竒創陡覺詩壇羣膽喪
自憐老退無好懷語不驚人慚少壯宦情不絕真如絲
有憤莫吐誰與咨只今猶得斯人語剩有風騷同激推
不堪人事長乖處聞說扁舟復西去十年一見意匆匆
更寫瀟湘別離句男兒氣節天所資道大何計合與違
但讀詩書談世事看公衣錦他年歸

金史卷之二
卷二
和野堂惠老中秋月蝕韻

一年清絕中秋時仰天高欲攀桂枝乾坤鎔入玉奩鑑
萬象一掃光芒垂今年不見今宵月有物噉之傾且仄
惜哉至此狼狽凶空效玉川歌月蝕一盃相囑三更夜
安得飛來明月借明年應解勝今年莫使詩人愁筆下
吁嗟今夕知何夕且對孤燈照窓隙夜闌搔首獨翻書
且喜燈前雙眼碧

和張季長少卿廬外亭韻

金城玉壘雄西邊雲崖凜凜摩蒼天環城萬井四十里
無處著眼江頭煙我來登臨重嘆息搜索勝景披雲巔
結亭百雉上南郭山川映帶圍桑田春風城南細麥好
夏雨城北圓荷鮮長瀾四溢去不斷茂林百種森當前
朝光下卷西山霧界天一白如鎔甄兩年寂寞誰知己
一日邂逅詩中仙品題印可喜所遇濶翻筆下源流泉
平山醉翁何以重一詞一記垂千年於今塵外已獨步
壯觀絕致誰爭妍痴兒莫苦簿書債一笑亭上應忘筌春

來花柳賸遨樂念我一舸方東適甘棠遺愛定無有赤
壁懷去猶能全他年吳蜀問安好簡繒各寄滄浪篇

和周元吉提刑席上得雨韻三首

西山忽作暮捲勢長蜺噴水驅炎暉雷車震動吹海立
火傘退避如鷁飛天公不憚翻覆手客醉何惜淋漓衣
雲收暑退夜空濶歸路已覺星河稀

湖山十里圍萬井烟雲過盡迎朝暉連巒得雨有餘態
歸鷺倚風無限飛田頭遠布翠縠浪池上暗濕紅裙衣

山翁何惜一倒載及此訟簡人已稀

蓬萊秦望兩如峙中有萬頃浮光暉自憐俗吏脚不厯
每欣竒觀身欲飛芄芄布野翠捲浪靄靄出袖雲為衣
詩材滿目供不盡只恐寡和詩人稀

野堂惠老惠筍

騎臺落日飡秋菊寒食江南饌錫粥一年節物正撩人
賸把嘗新伴幽獨平生慣飽藜藿淡口腹累人何日足
故園又作穿籬態解籜呈新包一束甘寒不澆礪礪腸

一飯更須炊白玉年來稍學長沙味一月煨藏愛餘馥
腥羶棄去不復念從渠且負將軍腹老僧日食常住供
飽坐饑食不論斛春來不訟籜龍窵每誦坡僊食無肉
箇中風味有誰同付與新詩照湖綠

謝惠補之送梁杲墨

江南點斂千峯長盤紆融結百鳥頑鍾靈孕秀山之玉
中有石墨時伏翔曹公萬斤如贏糧士龍二螺石髓香
人間那得掣筆郎此物我亦成空囊松煤僅貯陳玄光

磨楯未辦文檄梁知公腹藁誇成章夢中盈袖方櫝藏
仲將一點容升堂佳哉秀句來一方愧我學書臨池旁
幸公瓊報毋相忘

寄于忠父先生

天教英雄聲名好滿眼看渠騰躅早吁嗟世事暗如漆
虞卿窮困劉蕡老平生翰墨彌九州豐城埋劒干斗牛
一官了不受羈束婆娑風月聊歸休天欲成之煩一蹶
子美東屯笑耕月諸山搖落不成林看取孤松歲寒發

西湖十頃玻璃風酒闌豪氣詩千筒請君流水照冰雪
長魚豈與蝦蜨同

再賦

詩來已報平安好猶恨得公詩不早忽聞單舸下滄浪
却喜此翁元未老折腰耐辱來皇州大手妙割無鷄牛
平生拄腹五千卷百未一究真難休我昔從之曾竭蹶
刮眼期公空歲月老來猶足舉千鈞豈是周郎獨英發
茗溪獵獵蘋花風溪樓萬瓦如鋪筒未須黃帽催歸去

尊酒一笑期君同

贈青眼楊相士

秋風撼撼敲庭櫺獨卧孤窻類瘖道人剥啄向東塘
欲識酸寒孟東野公今以直不以情我亦論心不論形
平生方寸只如此政可煩公雙眼青年來萬事翻成覆
幸有藏家書可讀丁寧莫學世間癡苦欲從公專問福
潜聖汪君辱借詩編作小詩歸之

是客胸中春百頃日夜葩花落毛穎奇芳珍艷亦不乏

綠牘紅餘盡桃杏定收三冬充腹肆那費五車壓牛領
不憂銅雀吻乾燥正喜詩泉勢奔猛舉槌聊作漁陽搥
成篇半是吳江冷誰憂玄豹老雲霧寒谷空濛光欲炳

渡嘉陵江宿什邡驛

山程十日不見江前日初逢黎渡水牽車又到渠江畔
漾漾翻波意尤美今朝嘉陵江水寬危峯大石更巔岼
棹兒艇子呼晚渡亦制鉦鼓推標竿渡頭楓綠薔薇密
我宿山南雍城側細思青史什邡侯君恩何似嗟來食

過蝦蟆泉

平生一壑清濯裳愛泉謹護如隄防酌飲爰至蝦蟆涪
水經第四源流長天教神禹使壬甲幻得蟾蜍半山壓
建瓴瀉出沆瀣清底事汗流猶背浹惠山車馬松江舟
兩泉寒冽天下求不知此水更奇品世間實處多名浮

過渠江渡

櫂歌江峽三月程頗厭風濤困征艣驅車山路兩旬浹
又覺崎嶇萃勞苦甘溪嶺下冉村路一道渠江折山塢

風平雨細無皺面
浥浥寒漪清客暑
渡船也學鉦鼓聲
催上籃輿傍江潯
夷猶短櫂瞥眼過
却懷江程久如許
山蹤水跡本遊戲
南北東西慣安處
茲行兩腳不遺力
千里環山幾艱阻
一江森森橫目前
如渴得泉旱得雨
流波聞向合州去
却入恭江匯西潁
便欲挾浪扁舟西
褰裳回首忻從之
君恩如天未酬一
一念悽悽繫孤跡
過故郡渡

山路一千三百里
中間四渡今江流
天涯作客壯年事

老馬長途幾日休，誰知江深念歸客。
日向峨岷無盡頭，舉首白雲天共遠。
四方上下與同愁。

過黃泥坂

牽車緩上黃泥坂，複嶺重崗甚前日。
躋攀千級下如之，十里三山三降陟。
平生兩脚疲辛酸，歲晚行路熟蹒跚。
人言蜀道如登天，未必登天如此難。

登嘉州萬景樓

我行大江西，勝槩數追逐。
南樓岳陽上，雄絕快心目。
今

到西南第一樓嗟哉餘子真碌碌巖層嶂疊匝天外蒲
淨葭叢蘼江曲三峩之雪晚在望九頂之雲暗相矗紫
紆拱揖儼左右吞吐澎湃環山腹瀾瀾潏潏三萬頃何
止江郊供遠矚俯觀大象欲墮地仰摘星辰幾可掬一
天萬景不可狀盡付此樓歸約束危欄徙倚納清觀蹁
躚意已追鴻鵠仙官五千九百到我亦悠然立於獨霧
收江際天接水日動山尖光漾木倚樓拍手叫青天一
笑江橫送飛鷺

舟行遇逆風

扁舟直下滄浪綠百里溪程消一宿天公噓吸解窮人
逆水衝風何太酷年來矻矻便深居一動一靜誠何如
不堪世事苦相逼政自未免奔走餘今朝莫訝東風逆
明日歸舟順如翼世間逆順豈關人自是人心長戚戚
過馬肝峽石形與色皆如馬肝迸出峭壁之上
予觀之蓋石芝耳大窠一本小者四五不知風
雨幾百載而質不敗賦石芝行

峴巖復峴巖昨日通靈灘通靈二十里有峽名馬肝一
山削壁立萬仞中有突兀如芝蟠輪囷累片葉盤結分
枝欒宛然老枝菌如出枯樹端大窠數尺迸崖縫小者
四五高低攢往來競稱馬肝石不悟石芝為異觀朝廷
日清明郡國無曠官鍾此溫厚氣瑞草凝嶺坑不見為
羊又為馬石芝靈異元非難此芝瑞峽中一一人看
何人果妙丹青手便可圖上歸長安

舟人強以二鰕多取漁人之魚余增百錢與之

作漁父行

老父家住逢家洲無田可種漁為舟
春和夏炎網頭坐茫茫不覺秋冬過
賣魚日不滿百錢妻兒三口窮相煎
朝飧已了夕不飽空手歸去蘆灣眠
今朝何人買鮮鯽直得千錢酬二百
拋錢帆去了不膺却謝君子為增益
嗟嗟莫怨行路人滿江風月儂最親
但看漁翁更强健銀刀赤尾長鱗鱗

峽中瀑布泉

萬石枕山眠千峰隨路轉林深暝巖穴一道寒泉澣分
明冰簾垂空壁隱約珠簾掛蒼石深山寂寞有誰知只
與行人潤詩筆

孔明廟柏

陵邱冉冉烟草新叢祠寂寂君與臣千年不死一庭柏
八陣猶餘三峽春

八陣圖在夔州城外春時郡人載酒歌舞其上

昔人已化遼

東鶴古往今來事如昨當年魚水奮雲龍天不興劉死
諸葛

題天衣寺

稽山道上多名蹟萬頃湖光襯山色雲蒸霧集累千年
屈指風流幾人物平生佳處身曾經賴此泉石供餘齡
愛山何惜買山費明珠不博娉與娉我聞天衣最奇絕
萬頃清涼掃煩熱持經夜半烏鼠聽忽覩金僊起還滅
把茅從此成開山法華妙果僧中賢當時十詔徵不起
神奇變化泥生蓮山神謹護泥封詔獨有遺風傳內教
袈裟金縷照琉璃時放祥光蔽雲物我來官守無時閒

著脚未歷城南山區區俗眼空自翳耿耿此意如循環
我心豈是真如石慙愧新詩與推激自憐未到此山中
想見入山深未得要令攻俗如攻城茲遊約與秋風迎
吾曹豈辦痴兒事為君一醉南湖清

朱東父作室

貪夫築室齊雲楣滿溢既死不可持佳哉高人世念薄
文室緝綴如繭絲門前流水照明月門裏有詩清更絕
汲泉欲漱齒怯寒攜杖先登腰易劣客不待速來往頻

剥啄扣門有誰謦主人酌酒要客醉坐客見花心自醒
長松古栢垂楊岸為糞一畝酒無算花開詩酒足逢迎
花謝蝶蜂漫零亂萬物榮枯付達觀我欲從君著眼看
儻能剝掃床頭金笑彼人間癡死漢

揚州堡寨

西風一舸來揚州足馬直上新城頭環城九里十六步
一一峭壁臨深溝俄馬唯喏兩軍士衆手指示陳其由
揚鞭試問築城意曰堡曰寨何所謀誦言長淮十六郡

天險地利茲其尤江橫萬里限南北藉此屏翰屯咽喉
向來強敵蹈此境夜半一叱遭虔劉平疇曠野不可限
一城未足防侵牟高城西北古城後因勢決策成楚丘
四門大開樓櫓備中有萬甲藏戈矛譬如一鎧何足恃
被之重鎧前無憂乃知舊臣建議僅出此我亦策馬嗟
去休不知城二勢則一添足畫蛇真贅疣君不見紫巖
先生昔經理釣橋深塹先防秋當時方畧豈不究而使
浪策為今羞吁哉成事不復說只恐前計無時酬書生

銜命偶經履一見敢謂可與不世間萬事一笑裏輕帆
送我催行舟

題陳日華二友堂

書生作吏從朱墨官事紛紛何日息不堪鴈鶩對敲朴
寧解詩書伴松竹太丘退食何蕭然筆研不落塵埃邊
前歲讀書山水縣今年二友來通川料君捧詔還朝日
老蓋寒梢應的皪此時留與後人看要使清風繼前跡

送陳景齋宰鉉山

我昔曾為江左國賸說鵝湖今壯邑頻年官府苦催科
百里齊民猶珥筆男兒遇事難是圖猛士縛獸須於菟
才高政不較難易知公此去無趑趄嗟予仰韓如仰斗
公亦登門及予否為言饑餓六年中兩眼猶能記千首

送周可大守通州

丈夫憂國如憂身疴癢疾痛均傷生胷中百藥寒涼明
有疾一試真權衡我觀周郎真豪英落落磊磊通而清
少年志欲天下平夜光無因匹夫驚萬卷堆胷兀相撐

尚論千載欣談兵不堪北首瞻神京抵掌不平中屢鳴
老來符竹疏新榮捧檄正須堪一行舌翻衮衮傾波瀾
察議之說何鏗鉤龍頭悅懌意若迎頌畧健論心為傾
朱轡好去方北征黃堂暇日煩經營老狐戀戀巢穴成
兩雛競鬪誇紛爭料公志畧須縱橫邊塵一洗誅長鯨
片言定可攻聊城覆巢熏穴无餘氓牢盆細務毋太縈
簿書期會毋留情只今了却功與名大副昔年梁楚聲
我来蹤跡水上萍與公相望幾連甕交情契合踰弟兄

顏頤上下相嘲評有時立論披腹呈彼此浩氣俱崢嶸
公今事業行軒轟我懷礪礪方聲盲願公不負忠與誠
歸來濶步名公卿願我百念一羽輕公乎訪我惟巖耕
送王齊卿教授造朝

江淨孤月寒山空野梅白我是天涯人却送東行客送
君直上蓬山首莫忘西南困征取功名富貴不須多只
把詩書垂不朽

寄中都故人

千山疊疊高入天中有縹緲之神仙
壁立煙容風虎卧林深洞啟雲龍潛
長安詩翁有健筆蜀道客子無新篇
尺書萬里寄天遠萬一故人曾我憐

用楊誠齋韻題吳夢與集

大鈞落落元無鉤百尺空卧元龍樓
天生斯人竟何用搖筆僅可供眉愁
詩人慣作驚人語富貴迫人嗟幾許
世間萬事要其終只今此道猶能東

陳日華刪定讀書林

雄編已汗南山竹對坐松篁誇鼎足猶嫌官事作癡兒
故向書林巧徵逐蒼龍宛轉鱗之而此君寂寞清且高
晚來鴈鶩無人進又報明公欲變騷

題王順伯秘書所藏蘭亭修禊帖

永和九年暮春日蘭亭修禊羣賢集含毫欲下意已先
媚日暄風佐搖筆當時一筆三百字但說斯文感今昔
誰知已作尤物看流傳人間天上得天高地遠閔不示
僅許一二翻摹勒忽然飛上白雲俱徑入昭陵陪玉骨

識真之士已絕少真者一去嗟難覓紛紛好事眼空眩
只把殘碑慕真迹蕭郎袖去明真贗定武傳來差甲乙
如丁如爪辨形似不豐不露分肥瘠人亡無復見風流
漫費精神疲得失臨川先生天下士古貌古心成古癖
搜竒日富老不厭如渴欲飲饑欲食有時瞥眼道傍見
倒屣迎之如不及牙籤軸已過三萬集古錄多千卷帙
平生著意右軍處並蓄兼收一何力賞音本在筆墨外
何必此優而彼劣清波萬頃渾一點明月一輪雲半入

是中元不礙真趣氣象典刑尤厯厯知我罪我春秋乎
政爾未容言語直我方隨羣厚其嗜門戶弗彊纔僅立
幾年冥搜政無那剩欲流涎分半席閱公善本三四五
不覺長歌書卷側義之死矣空費公家九萬箋安得斯
人寫金石

十月雪四白

夜來風絮鳴觥稜紛紛消息何頻仍不堪十月已四白
豈暇一歲誇三登祁寒未必小民怨哭雪政恐樵夫憎

窮閭冷市糴貴穀破竈濕葦燒層冰寒窻又凍詩翁筆
清夜誰憐貧婦織人言宜瑞不宜多官放論錢不論日
請君高吟祈碧蒼願天今夕開扶桑寄語龍公且相卹
忍待明年莫倉卒

倣東坡從歐陽公詠雪體不用鹽玉鶴鷺絮蝶
飛舞為比不使皓白潔素等字

樓頭一夜寒聲促但怪重衾慣藏六小窻起聽枯葉鳴
更覺凝寒透肌粟乃知龍公修故事幻作輕細巧翻覆

搏空積勢欺簷楹過眼隨風滿坑谷雲濤衮衮浩無際
頃刻庭前三萬斛小山愛我已霜髯老盡蒼崖垂布瀑
兒童愛雪不愛身堆削形樵笑盈掬風梢嫋娜困無奈
一一扶頭恣敲朴我來茗雪四寒暑破漏憐渠數間屋
無人推戶起僵卧漫把清風繼前躅寒爐夜撥終不焰
凍筆呵吟已先禿人間憂樂有定分隣家乃奏琵琶曲
回飈落屑點翠袖紛紛花映花奴肉杜陵老眼不禁寒
只有詩筒再三讀請君早辦雪兒歌喚取詩翁醉醺醺

雪中簡林子長

玉沙飛墮何袞袞一夜青山損顏色此山底事厭青姿
故學何郎輕傅粉曉來窻戶何人開僵卧欲起驚皚皚
微風浙瀝捲還起片片直上雙毛來扁舟賸欲敲鄰屋
料得羔羊酒初熟瓊瑤欲盡不可留梁園歌吹須君侯

巫山十二峯二十五韻

巫山磊塊山林姿一邱一壑貪成癡寸峯拳石瞥眼過
張皇攫覓惟憂遲東南佳山多秀麗就中所欠雄與奇

飽聞巫山冠已峽奇峯十二相參差昔年圖畫常一見
欲見此山無路之扁舟西泝上三峡千巖萬壑爭追隨
終朝應接已不暇心目洞駭俱忘疲驀然鐘鼓高唐上

峯巒二六排旌旗一峯霞彩迴在望一峯展翠開屏帷

望霞峯
翠屏峯

無心出岫雲吐色偃蓋平巒松並枝

朝雲峯
松巒峯

仙

蹤鶴駕羽衣近壇石瑤臺閭闔低

集仙峯聚鶴峯
淨壇峯上昇峯

白雲


一起鳳皇下清泉四合蛟龍嬉

起雲峯聖泉峯
栖鳳峯登龍峯

羣峯角

立變態異一大巧乾坤為外堪擊拊試聲律中含造

化分四時天下名山亦多矣未有列岫奇如茲九華一
景固天巧惜與江流相背馳南北兩峯喧衆口妝抹却
恨同西施何如此峯無限好行行列列臨江湄烟雲漠
漠出寸碧風雨時時橫黛眉舟人漁子漫回首騷士墨
客勞支頤我來穿水入天去貂裘章甫生塵縑昂頭見
此大奇特躋攀不上空嗟嘻吾將欲訪三島登九嶷上
蓬萊道山之壁絕泰華終南之嶺飛鳬去舄嘯滄海却
來巫峽溫前詩



東塘集卷二

欽定四庫全書

集部

東塘集卷

三四

詳校官右中允

臣薩

敏

主事臣呂雲棟覆勘

謄錄監生臣嵇承羣

謄錄貢生臣吳壽康

欽定四庫全書

東塘集卷三

宋 袁說友 撰

五言律詩

喜晴放海棠

春日海棠早媚雲開遠嵐醉容猶未足睡態已微酣嫩
綠千枝襯殷紅一點含東君真有助落筆為渠談

常通判惠虞美人花亦名雙魚兒花

好景無窮巷名園有異姿春今十分好花又一番奇比

目紅綃結雙魚碧玉枝孤窻還遣伴空憶美人詞

盆池荷花

根向盆池束華敷茁茁叢細擎深院宇低裊半窻風蘸
水凝綃翠當軒試臉紅化工雖力淺猶折小蓮蓬

石上玉簪花

根齧稜稜石香銜寸寸心誤人猜落藥眩眼拾遺簪掬
水滋繁種柔枝倚短岑清姿浮玉潤不受暗塵侵

植花於假山

巖石稜稜巧盆池淺淺開空山初幻化方丈小飛來屈
曲清泉溜參差細草栽只今山在眼着眼便徘徊

石上水蕉

傍石根斜綴澄波葉半舒氣涵流水潤冷徹內心虛帶
月軒窻外凝藍雨露餘憑將摩詰畫雪裏細尋渠

和林子長種菰韻

城郭千林靜菰蒲二頃宜移根元不費殖利已先知僅
脫黃泥賤相從白玉炊平生慣藜藿於此羨耘耔

屋後植竹

穗袖三年手新鋤十丈園傍山移早筇掃徑斲孤根瑣
碎梢頭影淒涼竹外村可人風月地頭角見龍孫

丹桂

月窟分僊種人間識此花十分晴殢酒一抹晚呈霞曉
鏡勻丹臉香肌挹絳紗相看秋色淨獨映夕陽斜

水竹

拳石環清泚龍鬚細屈蟠兩峯低崒峩一簇小琅玕密

葉風前影疎枝水底寒相從此君爾著意問平安

楊梅

酒著圓腮重珠聯細葉芳絳紗籠蜜顆朱粉皺新粧色
漬桑間堪甘傳荔子漿輕酸認梅種草木有他楊

莫子章惠蒲萄

慣病宜秋早分甘荷歲寒驪珠初壓架馬乳又堆盤酒
美誇重醒書成欠百端不須煩廣利移種眩長安

謝周唐卿分惠宣梨二首

啄木門初扣分甘味占高風標誇飮坐津津憶流膏賸
受千梨戶寧辭五藏刀一杯須領意老欲為渠饗

澹澹夕陽遠行秋塞鴈高卷舒連夜燭長短幾繁膏貧
豈嗟懸磬家猶及賣刀藜腸憤羞溢更覺近來饗

周可大惠崑崙桃

秋雨成蕭瑟細桃辱記存品高來禁籞地遠想崑崙幸
有千年實愁無五石樽欲修瓊玖報素手愧空言

謝侃老惠乳糕

多病柘漿酒間愁梅雨天婆娑清夢斷剥啄好音傳憐
我齏鹽薄從渠乳酪鮮莫嗟聞道晚著意問師禪

嘗顧渚新茶

碧玉團枝種青山擷草人先春迎曉至未雨得芽新雲
疊槍旗細風生齒頰頻何人修故事香味徹楓宸

惠相之惠顧渚芽答以建茗

一室環三徑諸郎讀五車山高空鎖翠澗濶自流花輟
我閩山焙酬君顧渚芽書來驚歲晚老去各天涯

鬪茶

截玉誇私鬪烹泉測嫩湯稍堪膚寸舌一洗覓藜腸千
枕消魔障春芽敵劍鉞年年較新品身老玉甌嘗

遺建茶於惠老

東入吳中晚團龍第一區政須香齒頰莫慣下薑鹽笑
我便搜攪從君辨苦甜更煩揮妙手銀粟看纖纖

沈無隱國正惠殿廬所賜香茶

公論歸吾黨平生只故人近書時遣况舊雨日相親茶

輟閩山貢香分御府珍須公文石陞回首雪溪濱

謝吳斗南教授惠貢茶

我愧周行久君方戴席重一緘馳素璽五玉卧烏龍滴
雪浮甌淺濡香過齒濃欲酬新句好官事正填胷

謝葉秀州惠酒

雅况尊壘重高情翰墨餘寒窻半杯醪老眼數行書舊
雨故人少因風來雁疎君侯獨懷舊一歲幾相於

晚春過雨

酒惡病成惱春深愁轉加園林三月事風雨一庭花燕
幕自相語蜂屯爭趁衙傍欄迎霽色溪上幾人家

梅雨踰月始晴甫兩日復大雨

猛作連朝雨愁添一尺溪頽雲驚滿坐漲水急平堤澤
國幾成壑田家未半犁關心獨朝暮剛認勃姑啼

和林子長池上聽雨韻

遠浦鳴疎雨平林送落暉霏煙青柳暗晚霽白鷗歸觸
目懷心賞憑川念昔非池塘消息近一笑莫身違

歸舟遇大風雨

客裏纔三日歸來僅一程
片雲天外立短棹雨中行
小却黃昏路猶須半夜晴
春光又零落游子不勝情

夏至日雨

煙暝千巖木溪明一帶樓
片雲封舊恨急雨冒新愁
節又匆匆過詩從軋軋抽
病軀無耐暑老鬢不禁秋

暑雨

獵獵蒲歌岸斑斑薜漬牆
簷低泣蛛網葉落濺蜂房
西

嶂暮凝色北窗新送涼晚來池上過風擘藕花香

溽暑雨後

多病愁如許催人暑奈何簷窮風有限雲薄雨無多浪
捲連村麥珠旋小葉荷炎涼苦多變四月未清和

雨中即事

夜雨恰一尺新秧高九分煙深數峯暗澗急滿山聞蒼
蔚添新翠溟濛藹暮雲田家方樂歲泥淖也忘勤

喜晴

夢斷窻全曙兒童競報晴層雲擘輕絮飛鵲噪新聲一
水長天靜雙溪萬櫓鳴傍簷聊覓句樂處漫蠅營

久雨霽後見月

漲水橫侵屋輕舟半宿溪竹風千影亂簾月一鉤低鼠
黠欺殘照鴉啼識故棲餘樽纔稍稍薄露已淒淒

暑夜得月

風攪桐聲碎螻鳴鼓吹長半山蟾吐影一水鑑浮光冷
碧迎秋色清飈借久涼不堪鷄唱曉歸枕報朝陽

登屋後城

笑傲愁如失，登臨酒半醒。
故將雙眼碧，割斷半山青。
土沃差宜竹，城高未著亭。
可人東郭外，綃翠舞娉婷。

雙溪亭

源委縈苔雪，乾坤接水雲。
半天孤月照，兩派一溪分。
日落虹垂影，魚翻縠斷紋。
煙波豈無義，邦人謂雙溪為無義水涇渭

固難羣

題小隱九曲亭

小隱前山入空亭往事忙
放泉盃曲水環坐客流觴雅
不尋絲竹歸宜釀酒漿
山陰莫專美更數水雲鄉

題墨妙亭

繭紙竒蹤絕龜趺古意長
憐渠風雨厄為爾屋廬藏
寂寂庭靜迢迢永晝忙
傷心三廢碣猶識漢文章

白蘋亭

苔水誇空闊蘋花笑汰寥

白蘋今無有矣

樓臺溪上女楊柳岸

邊橋涼月明烟渚春水稱畫橈
晚來魚一躍帶雨識魚跳

北園

茁茁暑風曉芙蓉秋露時青山無限好明月故相宜雨
長穿城竹湖深隔岸池春堂夜留客舉首問南箕

水西葉氏園

石林
之後

風月欲在眼園林須傍家峻嶒飛翠巘颭灩舞綃花門
近山光入堂深樹影斜猶將小西景更為石林誇

俞氏園

好景環深院名園得故家樓高春帶月池曲曉催花亭

著城頭穩溪浮眼界賒成陰雖歲月老樹看槎牙

雪川名園

園惟俞園

歲月最久

王氏山居

豆粥通幽徑松杉蔽野門
眼空樓外碧身落洞前村
荷靜風巖曉梅開雪月昏
環山書未捲林薄鳥聲喧

六客堂

山水吳興窟風流一代雄
滿城溪月裏六客笑談中
玉骨埋黃陌雲書掛碧空

六客堂東坡所書也

聲名百年舊無復二

三公

碧瀾堂

照影瀾飛碧臨深雨過涼夜橫千櫂月冷浸一溪堂魚
躍翻寒藻鷗閒戲夕陽百年數行客幾度落危檣

題顏魯公懷忠堂

羽化仙家久祠嚴雪水東一身終許國千載獨懷忠徒
倚豐碑舊瞻依古像雄堂堂祭如在從祀有坡公

慈感寺

門迫滄浪水堂深秦華蓮光芒珠一粟相貌佛諸天

寺藏

蚌珠具羅漢如來相

樹老半無葉僧閒誰問禪雨暘須大士澤國

屢豐年

遊慈感寺用壁間趙安石韻

薄俗冷還暖餘年春復秋詩窮無限意身老半生愁飽
睡書慵展居閒客強留功名羞鏡裏白髮奈盈頭

慈感寺放生

生滅成宗劫慈悲種善因紛紛嗟蠢動一一付波臣物

我形聲異人禽愛惡均不堪明月夜小艇擲絲綸

慈感寺四月八日浴佛會

一刹傳經地諸天誕佛辰猶將清淨水更浴涅槃身居士應無垢菩提各有因要須憑苦海萬里滌情塵

同周可大莫子章同遊證通寺

好友頻相過閒愁一笑忘逶迤蕭寺徑淡薄老僧房飽飯溪山足空門日月長歸來懷妙語心地轉清涼

天寧寺有白石曰卞山脚石上多名公題識

隱隱來崗續沈沈土脉縈一峯庭下立十里地中行石
脚猶依佛山腰恰近城摩挲嗟歲月風雨幾題名

侃老捨天寧寺往遊何道二山二首

拍手笑無語挑包去不還行行餘一鉢歷歷上諸山明
月隨方照孤雲任意閒猊床待師處猿鳥撒松關
飛錫真游戲論詩解往還一聲獅子吼十里道場山綠
竹靜無語白雲長自閒趙州應路滑無復嘆間關

遊清凉寺逢說命者傳會云師垣星照西方

奔走纔千里辛勤說五行星躔初下照君命趣東征萬
壑乾坤注千艘日夜橫江山看不暇此役快平生

峴山塔院

野寺埋荒草浮屠出近郊松聲來蓀樂竹影亂旗梢地
僻鐘魚響庭空燕雀巢斷崖流澗遠隱隱下山坳

送惠老往住上方

又作西山去潮音鼓一通叢林推此老詩社得諸公著
眼浮生外衝風逆水中殷勤三請已此意不雷同

過富池廟

祀典名稱重神靈遠近聞陳牲共豕一裹飯集烏羣水
旱憂民切江山護國勤丹誠禱祠下不敢事虛文

霸王廟

志大無遺策天亡有愧心威稜空炯炯祠殿獨陰陰木
秀千年古溪流萬折深江東父老意羯鼓奏新音

過三山磯有廟祀李氏女嘗以詩託之過客夢
中江神曰遊奕將嘗求經於陳惠公得冥司遷

職

磯到三山峻，濤奔亂石濱。
吟哦靈女廟，遊奕護江神。
古往人何在，幽冥事已深。
平生仗忠信，持此問天津。

訪趙王北園荷池

小熟烏程釀，重遊習氏園。
亂蟬依柳噪，疎雨趁荷喧。
短棹雙溪靜，輕鷗一羽翻。
青山滿歸路，新月送黄昏。

過鄰水縣橫碧川

一水橫空翠羣山，送遠陰臨流。
新柳媚隔岸，小樓深五

斗淵明米菴年子賤琴可人山水縣莫倦讀書音

出東城觀水

浩蕩東城外微茫病眼開
烟颿一鳥過雲插亂峯堆
綠水漫漫去青山衮衮來
飛邊雙鷺沒天末晚風迴

駱駝橋

家住水雲窟路分苔雪溪
天高橫蝦蟇水闊跨鯨鯢
捲浪去還却行人東望西
帆檣驚歲月橋柱幾人題

甘棠橋

波入南溪綠荷薰夾岸香一川虹倒影百步帶橫塘

邦人

為橋如
腰帶形

舟傍橋邊柳魚驚月下榔人已遺愛遠誰復賦

甘棠

舟行夜過甘棠橋

遠鼓三更急長虹十丈低影浮冰鑑月身渡玉壺溪畫
燭人應醉桃源路肯迷疎星與殘月點點下玻璃

舟泊竹篠港夜坐誦後山詩

沙岸人歸後船窓月上時霜風竹篠港燈火後山詩歲

晚羈懷惡江空熟路遲鄰舟一樽酒不使老夫知

舟發黃州連日遇逆風泊赤壁

赤壁磯方到黃州路未遙辛勤四十里跋涉兩三朝
戢戢牛羊下閒閒鷗鷺驕忍將今歲月容易客中銷

舟遇逆風有葉舟坐二小兒以一竿掛二笠代
帆而來

小艇浮孤葦垂髻識二童巧將雙箸笠快奪一帆風去
去漁歌裏翩翩麥浪中吳兒慣浮浪早已逐飄蓬

舟行邂逅別吳子明郎中

杜宇催歸急青山送客忙去帆辭斷港過眼接危檣親
戚五年別尊壘一笑長山西墮殘照不忍酌離觴

庖人舟以風殿後早飯不繼

帆席攬前去炊煙落後陳一杯羹已飫方丈食何因自
分貧兼客休嗟愁殺人江風吹送穩晚酌待頻頻

舟中懷稚子

遠浦三更月春風一夜程平生慣安靜多病怯征行急

櫓誇先後連山護送迎關心小兒女幽夢落東城

觀漁舟得巨魚

猛作修鱗想觀漁憶故濠橫舟排雪浪敏手奪銀刀過
熟偏宜酒餘鮮更帶糟忍窮須忍口老矣為渠饗

舟過七里店迂客

漲水一篙足環山七里長維舟橫畧釣驚鷺入菰蔣話
舊人俱老相嗟鬢各霜年來慵不出猶未免迎將

舟中酒味酸許深父漕使以家釀來亦不欲受

樽酒稱臺餽牢辭以例陳獨醒心已醉不飲意如春凝
望嗟陶令誇醒策伯倫兼金有前訓寄謝白衣人

月河

路轉雙溪曲河灣一逕通
清秋楊柳月落日芰荷風直
抵濯纓水當前文筆峯滿城佳氣聚擢秀美羣公

練湖

練湖四十里往往半徐州
巨浸膏千畝餘波濟萬艘回
旋迷宿鳥浩蕩狎飛鷗父老相迎問猶懷早暝憂

入淮

桐栢分源遠清流接泗濱於何號邊境不忍問淮民北
顧關山在西風草木新天河如可挽吾欲洗邊塵

上官桀詐令人為燕王旦上書言光疑有非常
臣願歸符璽宿衛察變上曰朕知是書詐也後
桀燕王等謀廢立事覺盡誅

燕國歸符璽將軍有謗書君王嗟詭詐黨與悉趙趙白
日中天照浮雲掃地除狂謀身一敗邪骨滿丘墟

高廟災董仲舒推說其意稿未上主父偃候仲舒私見嫉之竊其書而奏焉上召視諸儒呂步舒以為大愚下仲舒吏當死詔赦之

老學推占後姦人媚嫉初懷私真詭計候見竊成書猛欲擠賢轍寧思戒覆車那知一回首身已斃誅鋤

文帝登虎圈問尉禽獸簿不能對虎圈嗇夫對甚悉上拜嗇夫為上林令張釋之曰今以口辨超遷恐天下爭口辨無實遂不拜

辨舌機鋒銳言簧巧意傾一聞賢者議衆鄙耆夫名利
口宜深戒違顏願力爭須知玄默化帝已久躬行

文帝議以賈誼任公卿絳灌馮敬等害之乃毀
誼曰洛陽年少擅權於是天子疎之以誼為長

沙王太傅

諸老讒言入長沙遠地留一聞天子議衆嫉少年謀自
墮姦諛術誰寬痛哭憂至今言絳灌猶為孔門羞

張湯治獄皆窮根本上欲釋嚴助伍被湯曰弗

誅後不可治巧排大臣益見尊任後以懷詐面欺上使使簿責湯湯為書謝遂自殺

最是慈祥日為臣慘刻聞變弓屠善類刺骨見深文流毒嗟苛吏傷恩負此君不知慚簿責一死尚何云

遇張玉叔荆漕自潼州易節來言蜀人兩載前以制帥相期矣

上愧三朝老深慚四蜀民君恩無語報世事有前因叱馭寧論遠捫參敢愛身但思强健日歸計莫因循

孟子開宰餘杭二首

畿邑三年令先聲百里春公朝勤恤隱吾道足親民不
作勞人想猶堪發刃新從渠清俗論裁豈豈已知津
得友寧論少登門不愧遲交游今有幾襟抱獨相期笑
我方椎鈍如公政驟馳我今懷舊意不敢愛於詩

武康縣治松桂林二首

松桂論交久詩書造道深猶於官事日不忘歲寒心此
地賡酬句他年蔽芾陰男邦有佳政應促詔綸音

詩競山川秀亭隨草木新
弦歌魯言偃吏隱漢梅真
淇苑雪霜搃廣寒宮殿春
相望不百里一葦要身親

遺雲液新醇花勝正焙於制幕

彥聚有英倫公餘無雜賓
一樽雲送液寸玉雪先春
浮蟻酒中聖團龍天上珍
遣之陪幕府聊以款車巾

曾同年南仲至自德清二首

歲月飛梭疾交游舊雨疎
故人欣戾止之子最相於
話舊須樽酒奔忙缺飯蔬
不酬千種意空寄一行書

老去慵馳騫詩來慰闊疏
吾廬聊復爾仁里盍依於
乞米慚書帖呼兒笑擲蔬
強吟鬚撚句博得玉鉤書

和同年張唐英懷弟晉英韻二首

舊學知何補丹心早已平
過從欣故侶慨慕熟英聲
笑洽愁腸釋詩來俗眼清
君家好兄弟何愧洛中程
嗜利終羞澁論交愧懶昏
日高快閉戶客至倦迎門
多謝鏗金語來如挾纊溫
窮年得佳友花柳樂村村

和張思濟縣尉韻二首

作計尋山徑論交獨兩生相過真有意多病只垂情老
怯終年別詩煩一夜程懷思幾秋夢月落曉溪橫

書債頻年積舟行一水期稍吟秋夜雨不盡故人思正
為才高累寧論事了嗤相忘心屢折落筆更蜚馳

和唐英韻

客久催歸馭愁牢愛大杯驪駒勤詠歎行李尚淹回皇
甫有書至蓋公何日來巾車莫濡滯祗此趣鹽梅

和丁端叔九日韻

風雨重陽候旌旗五客遊清樽煩卜夜歸翬但驚秋薄
暮靄雲散傾城終日留晚樓東望際黃菊故園丘

和人懷歸

宦海風波惡窮途故舊新匹夫猶按劍夜壁莫投人狎
水舟沈羽防城口累身歸來老丘壑一笑樂吾真

和林子長家庭韻

諸郎方競秀蘭玉謝庭家國士無雙譽蟾宮第一花侍
嬪歌采芣笄鬢綰堆鴉已辦如椽筆綿綿賦陟瓜

和惠老自上方來住廣福寺

歲晚逢三友身閒愛一丘
喜聞孤錫至又向白蘋留
失笑拈花手無人野渡舟
個中須具眼著語待公酬

鄉人徐辯道見過自云有升平遺策當挾之西
遊乞詩祖行聊作一首

鄉翁初識面獨往定何如
客舍風霜急權門韋布疎
北書應有犬南食尚無
魚身外祇遺策蒼苔空故廬

故人爽貸粟之約

小泊漁舟晚春風燕子回從渠三月約誤我一舟來風
雨故相厄溪山猶可陪人生竟何有此抱向誰開

謝王進士惠近作

秋入淮鄉老風連塞鴈悲一書煩故舊七字更新奇我
已歸颿日公方客館時天涯每相遇不敢愛於詩

謝李兼善書庫寄近作

筆下陳無已香分一瓣奇有孫今見嫡得髓政忘皮懷
舊書來日驚人語妙時猶思頻咀嚼燕子百篇詩

謝趙周錫制幹和篇

甫擲拋磚句俄驚翻水成源泉誇敏思擊鉢噤無聲白
玉彫鐫巧黃金煅煉精我慚非腹藁不復敢披呈

疑獨學錄屢過僕言詩又遺以成編蓋區區每
有意於此而拙無佳語為大恨因作鄙言奉報
初聞富經術頗復事風騷作者意不盡斯人才已高大
編來警策短髮對爬搔好語遠相避獨憐曾幾遭

泊金陵得仲元書

親戚不忍別弟兄那可離枕邊鴻鴈信天外鶴鴒詩老
大須長健音書莫較遲今朝萬金至無語不成思

興化吳宰商卿來書

百里報消息一緘勞寄馳但知懷舊切猶恨得書遲儒
者可言政懷邦當易為問君安否外別後幾篇詩

讀書

宦牒剛馳逐篇章半掃除稍尋無事日重理舊詩書筆
硯寒燈寂軒窓晝景舒政須堂下問糟粕意何如

持課

夢接三乘境香勝一炷薰風牕獨趺坐鳥雀聽聲聞目
想金剛會心存貝葉文稍蠲煩惱毒天雨看續紛

周可大攜子入山讀書

一日不覲面三秋應動心剛聞將子去又慣入山深飯
飽羣書樂窻閒萬竹陰扁舟纔十里得得要相尋

訓子

投老尋三窟傳家只一經呼兒親料理開卷熟叮嚀我

已頭居白誰堪芥拾青頗懷蘭與玉長憶謝家庭

展掃先塋

寂寞千松老縈紆一水通重來驚鬢雪遺恨滿春風拱
木人何在傷心淚已窮羈懷不成寐月落半山空

展掃先塋省伯氏用前韻

久作弟兄別相看笑語通寒窻酌酒夜落月對床風志
得寧論晚名高不畏窮君看天下事一一漫彫空

閉戶

戶屢無人滿庭羅盡日張閒窻書白羽清夢熟黃梁瓦
甕茗溪淥銅鑪柏子香出門本無礙龜穴慣深藏

曝書

紅日庭初熨青編手自摩烏跋浮竹簡魚蠹眩陽和眼
恨頻催老書慚未觸多相看不相棄同老故山阿

試硯

斷壁推良質寒窻足雅供點分鸛眼秀色漬馬肝濃巖
浸端溪月紋藏古歛峯可憐方寸石筆下幾迎逢

治藥

藥採人間足方從肘後參年來醫罕問老去病多諳風
雨關淫疾刀圭辨苦甘君看不龜手猶敗越人南

理髮

揀髮亭移晝臨風手獨搔愁添絲幾縷老怯鬢雙毛自
歎頭顱薄空懷膽氣豪年華莫相逼疎櫛已如縹

懷仲子病目

秋日家鄉遠西風去鴈遲小兒應藥喜老父數歸期昨

夜三江夢今朝五字詩至情如飲水冷煖自深知

家信報仲子目疾已平用前韻

峴也平安久書云傳遽遲意寬千里遠歸更一旬期眼
過無非景身閒足可詩江湖終欲老鷗鳥已先知

有感

萬事緣憎愛孤衷只恣愚歸與乖俗好老矣誤時須舉
世冲霄鵠何人濫吹竽窮通一不問無復鬼揶揄

偶成

老眼慵開闔窗獨欠伸夢殘亭過午漏永箭浮申黃
卷卷舒足黑甜味真生涯惟一枕百慮不關身

燈花

一點寒釭照樓頭夜鼓過報人初綴玉戲我只空花身
已遺榮辱燈應誤逞誇焚膏晷昔事牆角幾葉斜

自適

有地容投老無田解賦歸浮生幾朝露活計一書幃閒
只詩添債愁應帶減園人間翻覆手莫怨是中非

絕糧

舊索長安米今無負郭田平生一飽計歲晚百憂煎漂
母今何有王孫空自憐日高亭欲午寒屋竈無煙

淮白

未識淮鄉味饕餮老不良及茲秋水漲已食小鮮肥衆
口雖難美飢腸本易為豈無鱸膾好物以罕為奇

古鏡

老眼羞看鏡華顛怯半霜棲遲勲業晚孤負歲年長月

透光深杳花搖影頽衣冠從爾正不趁曉來粧

景山寺古鼎

小憩山前路清談得道僧愛渠惟一鼎持此供三乘製
作前無古摩挲喜不勝茲遊真可樂著句憶吾曾

靈壁蹲石

幾朵連峯峻千年古鏡浮氣分靈壁秀聲逐泗濱流笑
我成孤影從渠老一丘山川多勝地擊拊嘆中州

洞庭立峯

絕壁橫翔勢當軒偉岸姿一峯雲欲下亂蘚雨頻滋獨
立霜寒耐銜空月影節緬懷黃石事猶想穀城時

玲瓏山

頗怪玲瓏景渾疑雷雨穿燈分巖下徑目駭洞中天傍
磴莓苔合環山草木鮮白雲時欲下煙鎖閉神仙

與副伴王領衛論奕象

輕兵三十二一著見安危尺馬渡河日單車馳敵時棘
門漫兒戲肥水付枰碁小試平戎手將軍更出奇

扇畫雪景

杖屨初寒裏林巒幻景同生綃明月影淡墨老霜叢點
染三冬雪招邀六月風呼童小揮手殘吹襲簾櫳

壁畫竹鶴

風月寒窻寂丹青半堵開南牆看儼立華表認歸來邈
想風聲唳求棲烏雀猜雨餘新著色點點上蒼苔

卞山石林

物是人非舊堂空語不謦千重雲天矯百態玉峻嶒斷

壁苔封徑懸巖樹掛藤摺願重覓日猶記昔年曾

午陰小飲

草樹澗邊青人稀自掩扃陰沈端午水晴映半天星倦
枕敷橫榻枯藜傍小亭誰知一杯酒小醉不嫌醒

和惠老元日立春復雪韻

一聲春正曉雪裏薦新年攬鏡星霜久催人歲月遷化
工原著意物態漫爭妍我老心尤遠居閒覺地偏

歸自郊外遇雪

細雨初收脚飛來已濺身
固應宜瑞雪未必困行人
酒裏寒猶重吟邊語未新
更憐渠白叟呵手訴車塵

和某提舉喜雪韻

冷徹狐裘薄風團柳絮堆
雪先迎臘至梅怯後時開
曉色連山老年華兩鬢催
浮生驚節物誰與賦歸來

東塘集卷三